

**DATO' KELANA MAAMOR** (1877–1945), Undang Luak Sungai Ujong, Negeri Sembilan. Nama sebenarnya ialah Maamor bin Kasim. Dia ialah waris di hulu, dipilih sebagai Undang Luak Sungai Ujong, menggantikan Dato' Kelana Lela Setia Muhammad Yusuf Hashim pada tahun 1889.

Pada 8 Ogos 1895, satu perjanjian yang dikenal sebagai 'Perjanjian Persekutuan' telah dibuat bagi membentuk Negeri Sembilan sebagai sebuah negeri, seperti hari ini. Dato' Kelana Maamor tidak terlibat kerana Sungai Ujong diwakili oleh Dato' Bandar Sungai Ujong. British diwakili oleh Gabenor Negeri Selat, Sir B.H. Mitchell. Kawasan lain diwakili oleh Yang Dipertuan Besar Seri Menanti, Tuanku Muhammad Antah, Jelebu diwakili oleh Syed Ali, Rembau diwakili oleh Dato' Sirun dan Johol oleh Dato' Johol. Dalam perjanjian ini, mereka bersetuju membentuk sebuah persekutuan yang dinamakan Negeri Sembilan dan menerima seorang Residen British yang bertugas sebagai penasihat kepada Yang Dipertuan Besar kecuali dalam hal adat istiadat dan agama Islam.

Pada 29 April 1898, telah dimeterai Perjanjian Negeri Sembilan antara Dato' Kelana Putera Sungai Ujong, Dato' Bandar Sungai Ujong, Dato Mendika Menteri Akhir Zaman, Dato' Johan Pahlawan Lela Perkasa Setiawan Johol dan Dato' Sedia Raja Rembau. Dalam perjanjian itu, mereka bersetuju melantik seorang putera bagi menggantikan Yang Dipertuan Besar yang telah mangkat. Pelantikan ini dibuat mengikut adat istiadat dan undang-undang yang telah diamalkan oleh Yang Dipertuan Besar sebelumnya.

Pada tahun 1930, Dato' Kelana Maamor memainkan peranan dalam mewujudkan semula jawatan Dato' Muda Linggi yang kosong sejak tahun 1912. Usaha Dato' Kelana Maamor yang disokong oleh kerajaan British menghasilkan kembali jawatan Dato' Muda Linggi pada tahun 1932. Dato' Kelana Maamor dianugerahi bintang Commander of British Empire (C.B.E.) oleh kerajaan British. Dia menjadi Undang selama 53 tahun.

Dato' Kelana Maamor meninggal dunia pada 15 Disember 1945, di Ampangan ketika berusia 68 tahun. Jawatan Undang Luak Sungai Ujong digantikan oleh Muhammad Kasim bin Abdul Rashid, waris di hilir.